

Il portal per datas geograficas è avert

■ (anr/fa) **L'impurtanza da geodatas ed il basegn da las pudair applitgar en la vita quotidiana creschan. Sin la pagina d'internet www.geogr.ch èn quellas datas disponiblas per tut il chantun Grischun.** «Dus terzs da las decisiuns politicas, economicas e privatas han in referiment spzial, nua sa chatta quai, co sa preschenta il vischinadi etc.», ha ditg *René Haag*, il president da la GeoGR Sa, ier a Cuira a chaschun d'ina conferenza da pressa, «en la vita da mintgadi daventan las infurmaziuns geograficas numnadas geodatas adina pli impurtantas.» Grazia al svilup spert dals ultims onns èn bleras da quellas infurmaziuns disponiblas oz en furma digitala e n'èn uschia betg mo accessiblas per ils spezialists, ma bain er per tut las personas interessadas. «Perquai ha decis il chantun al principi da l'onn 2005 da stgaffir ina plattforma d'internet che preschenta e metta a disposiziun geodatas dal Grischun.»

In partenadi public-privat

GeoGR è vegnida fundada la fin da schaner 2007 sco societad anonima. Mintgamai in terz dals acziunaris èn il chantun Grischun, l'organisaziun professiunala dals inschigners-geometers (IGGR) e quella dals planisaders dal territori (PTGR). L'organisaziun unescha las enconuschientschas e las fermezzas dals trais partenaris. Dapi mars da quest onn è la pagina www.geogr.ch online. La societad GeoGR rim-

na ed intermediéscha las geodatas. «Ella dispona da la cumpetenzza necessaria per colliar las enconuschientschas davart las geodatas, da vesair e d'ademplier ils basegns da la clientella e dals proprietaris da las datas», ha menziunà Haag. La digitalisaziun da questas datas gida tenor el ils spezialists ad exequir lur lavur, «e sch'i reussescha d'extender il diever da las geodatas sin in circul da personas pli vast che quel dals spezialists resulta ina plivalur economica». Per regla surpiglia ils custs per la digitalisaziun da geodatas quell'istanza che ha incumbensà questa digitalisaziun.

Datas accessiblas a tuts

«Mintga burgais po profitar da las geodatas», ha ditg *Peter Huser*, «per planisar activitads dal temp liber, per sa procurar datas en connex cun proceduras amministrativas, per sustegnair activitads d'uniuns u simplamain per schlargiar la savida personala.» Tut las interpresas che planiseschan e realiseschan projects u che cultiveschan objects da l'ambient pon profitar da la disponibilitad online da las geodatas. Quai vala er per l'administraziun. «Sin nossa pagina d'internet chattan ils interessads datas da la mesiraziun uffiziala, plans da zonas, inventaris da la protecziun da la natira e cuntrada, plans da survista, models da datas digitalis ed auter pli.» Sco che Huser ha cuntinuà pon ins «en il senn d'in service public» consultar, cumbinar

e stampar las datas fin a la grondezza A3 gratuitamain. Dapi mars 2008 ha registrà la plattforma geodatas gia passa 12 000 visitaders. «Enfin uss èn vegnids stampads gratuitamain passa 10 000 plans en la grondezza maximala d'ina pagina A3.» Ma er per gronds clients è l'acquist da las geodatas tenor Peter Huser favuraivel.

Ulteriuras infurmaziuns e la declaraziun exacta da l'adiever survegnan ins en l'internet sin la pagina www.geogr.ch.

Tuts èn represchentads

Il cussegl administrativ da la Geo GR SA sa cumpogna dals suandants commembers: Il president René Haag, da professiun geometer, represchenta l'IGGR. Il vicepresident Peter Huser, er el geometer e planisader dal territori, represchenta l'organisaziun professiunala PTGR. *Aurelio Casanova*, il manader da l'Uffizi per agricultura e geoinfurmaziun, represchenta il terz partenari, il chantun Grischun. Il fiduziari *Bruno Tscholl* ed il giurist *Thomas Hess* èn ils ulteriurs commembers dal cussegl administrativ.



Il president René Haag, il vicepresident Peter Huser ed il cassier Bruno Tscholl (da san.) da la GeoGR SA han preschentà la purschida da la societad.